

Sabah terima peruntukan bina sekolah paling banyak

Kerajaan MADANI komited laksana pembayaran semula 40 peratus

Oleh Poliana Ronnie Sidom
bhnews@bh.com.my

Sandakan: Komitmen Kerajaan Persekutuan terhadap Sabah bukan hanya kepada Perjanjian Malaysia 1963 (MA63), malah merangkumi pembangunan pendidikan dan infrastruktur asas.

Perdana Menteri, Datuk Seri Anwar Ibrahim, berkata Sabah menerima dana pembinaan sekolah baharu paling banyak sejak tiga tahun kerajaan sekarang memerintah, selain peruntukan tambahan untuk menaik taraf kemudahan pendidikan yang uzur.

"Sekolah teruk, jalan berlobang. Ini semua kita tangani. Paling banyak sekolah baru semasa kita perintah. Ibu bapa yang ada anak tolong ingat ini.

"Nak marah sikit okay. Nak tegur sikit tak apa. Saya tak marah. Saya faham. Kadangkadang orang susah saya faham tapi jangan kata kita (kerajaan) tak tolong.

"Ini kerajaan Pakatan Harapan (PH), paling banyak tolong orang susah," katanya berucap pada Program Ramah Mesra Bersama Belia Sandakan di Kampung Sim-Sim, di sini, semalam.



Anwar ketika berucap pada Program Ramah Mesra Bersama Belia Sandakan di Kampung Sim-Sim, Sandakan, semalam. (Foto BERNAMA)

Turut hadir pada program itu kedua-dua calon kerusi Dewan Undangan Negeri (DUN) Elopura dan DUN Tanjung Papat, Vivian Wong Shir Yee dan Tang Szu Ching.

Bukan bahan retorik politik

Anwar juga menegaskan kerajaan pimpinannya komited melaksanakan pembayaran semula 40 peratus hasil bersih kepada Sabah seperti termaktub dalam MA63 dan menekankan isu itu tidak lagi menjadi bahan retorik politik.

Beliau berkata, hanya Kerajaan Persekutuan di bawah PH yang memulakan rundingan serius dan langkah pelaksanaan terhadap tuntutan berkenaan.

Katanya, kerajaan mengembalikan kuasa pengurusan elektrik kepada Sabah serta meluluskan tambahan dana besar bagi memastikan pembinaan infrastruktur tenaga berjalan lancar.

"Jumlah 40 peratus ini bukan sekadar cakap. Dulu banyak pihak sebut, tapi masuk poket. Sekarang, saya Perdana Menteri.

Kita janji, kita jalan untuk rakyat Sabah.

"Sabah minta elektrik. Kita bagi balik. Mereka kata tak cukup dana. Saya tanya berapa? RM1.2 bilion. Kita lulus. Kita bagi. Untuk memastikan Sabah cukup tenaga," katanya.

Anwar turut mengingatkan rakyat Sabah mengenai kepentingan kestabilan politik pada peringkat negeri dan Persekutuan, sambil menyatakan pembangunan hanya mampu dilaksana secara konsisten jika kerajaan kukuh dan bekerjasama erat.